

四庫全書

史部

欽定四庫全書

元史卷九十一

明翰林學士亞中大夫知制誥兼修國史宋濂等修

志第四十一上

百官七

行中書省凡十秩從一品掌國庶務統郡縣鎮邊鄙與
都省為表裏國初有征伐之役分任軍民之事皆稱行
省未有定制中統至元間始分立行中書省因事設官

官不必備皆以省官出領其事其丞相皆以宰執行某處省事繫銜其後嫌於外重改為某處行中書省凡錢糧兵甲屯種漕運軍國重事無不領之至元二十四年改行尚書省尋復如舊至大二年又改行尚書省二年復如舊每省丞相一員從一品平章二員從一品右丞一員左丞一員正二品參知政事二員從二品甘肅嶺北二省各減一員郎中二員從五品員外郎二員從六品都事二員從七品掾史蒙古筆且齊回回令史通事

知印宣使各省設官有差舊制參政之下有僉省有同
僉之屬後罷不置丞相或置或不置猶慎於擇人故往
往缺焉

河南江北等處行中書省至元五年罷隨路鄂羅官詔
參政阿里僉行省事于河南等路立省二十八年以河
南江北係要衝之地又新入版圖宜於汴梁立省以控
治之遂署其地統有河南十八路七府

江浙等處行中書省至元十三年初置江淮行省治揚

州二十一年以地理民事非便遷於杭州二十二年割江北諸郡隸河南改曰江浙行省統有三十路一府

江西等處行中書省至元十四年置十五年併入福建行省十七年仍置省于龍興府而福建自為行省治泉州二十一年以福建行省治入江西二十三年又以福建省併入江浙本省統有十八路

湖廣等處行中書省至元十一年右丞相巴延伐宋行中書省事于襄陽尋以別將分省鄂州為荆湖等路行

中書省十三年取潭州即署省治之十八年復徙置鄂州統有三十路三府

陝西等處行中書省中統元年以商挺領秦蜀五路四川行省事三年改立陝西四川行中書省治京兆至元三年移治利州十七年復還京兆十八年分省四川尋改立四川宣慰司二十一年仍合為陝西四川行省二十三年四川立行樞密院本省所轄之地惟陝西四路五府

四川等處行中書省國初其地總于陝西至元十八年以陝西行中書分省四川二十三年始置四川行省署成都統有九路五府

遼陽等處行中書省至元二十四年置治遼陽路統有七路一府

甘肅等處行中書省中統二年立行省于中興十年罷之十八年復立二十二年復罷改立宣慰司二十三年徙治中興省于甘州立甘肅行省三十一年分省按治

寧夏尋併歸之本省治甘州路統有七路三州

嶺北等處行中書省國初太祖定都于哈喇和琳河之
西因名其城曰和琳立元昌路中統五年世祖遷都中
興始置宣慰司都元帥府大德十一年改立和琳等處
行中書省右丞相左丞相各一員至大四年省右丞相
皇慶元年改嶺北等處行中書省設官如上置和寧路
統有北邊等處

雲南等處行中書省即古南詔之地初世祖征取以為

郡縣嘗封建宗王鎮撫其軍民至元十一年始置行省
治中慶路統有三十七路五府

征東等處行中書省至元二十年以征日本國命高麗
王置省典軍興之務師還而罷大德三年復立行省以
中國之法治之既而王言其非便詔罷行省從其國俗
至治元年復置以高麗王兼領丞相得自奏選屬官治
瀋陽統有二府一司五道

各省屬官

檢校所檢校一員從七品書吏二人

照磨所照磨一員正八品

架閣庫管勾一員正八品

理問所理問二員正四品副理問二員從五品知事
一員提控案牘一員

都鎮撫司都鎮撫一員副都鎮撫一員

宣慰司掌軍民之務分道以總郡縣行省有政令則布
于下郡縣有請則為達于省有邊陲軍旅之事則兼都

元帥府其次則止為元帥府其在遠服又有詔討安慰
宣撫等使品秩員數各有差等

宣慰使司秩從二品每司宣慰使三員從二品同知一
員從三品副使一員從四品經歷一員從六品都事一
員從七品照磨兼架勾管勾一員從九品凡六道

山東東西道 益都路置

河東山西道 大同路置

淮東道 揚州置

浙東道 慶元路置

荆湖北道 中興路置

湖南道 天臨置

宣慰使司都元帥府秩從二品使三員同知二員副使
二員經歷二員都事二員照磨兼架閣管勾一員

廣東道

廣川置

大理金齒等處

蒙慶等處

右二府設官如上唯蒙慶一府使二員同知副使
各一員經歷都事各減一員

廣西兩江道

靜江路置

海北海南道

福建道

八番順元等處

察汗諾爾等

右五府宣慰使都元帥三員副都元帥僉都元帥
事各二員餘同上

宣慰使兼管軍萬戶府每府宣慰使三員同知副使各
一員經歷一員都事二員照磨兼管勾一員

曲靖等路

羅羅斯

臨安廣西道元江等處

都元帥府都元帥二員副元帥二員經歷知事各一員

壯庭

隸吐蕃宣慰司

察遜塔拉

都元帥三員

蒙古軍

征東

二府都元帥各一員
副一員

元帥府秩正三品達魯噶齊一員元帥一員經歷知事
各一員

李店文州

帖城河里洋脫

朶甘斯

當陽

岷州

積石州

洮州路

圖沙瑪路

十八族

右九府唯李店文州增置同知副元帥各一員其餘八府隸吐番宣慰司設官並同

宣撫司秩正三品每司達魯噶齊一員宣撫一員同知副使各二員僉事一員計議經歷知事各一員提控案牘架閣一員損益不同者各附見于後

廣南西道

不置副使僉事

麗江路

以上隸雲南省

順元等處

播州

思州

以上隸
湖廣省

叙南等處

隸四川行省不
置僉事計議

安撫司秩正三品每司達魯噶齊一員安撫司一員同
知副使僉事各一員經歷知事各一員損益不同者各
附見于後

師壁洞

不置達
魯噶齊

永順等處

散毛洞

以上隸
四川省

羅番過蠻軍

不置達
魯噶齊

程番武盛軍

金石番太平軍

臥龍番南寧州

小龍番靜蠻軍

不置同
知副使

大龍番應天府

洪番永盛軍

方番河中府

蘆番靜海軍

新添葛蠻

以上隸
湖廣省

招討司秩正三品達魯噶齊一員招討使一員經歷一員

土番

喇嘛網等處

天全

班布爾實

松邊溪洞

以下各置副使一員無達魯噶齊

索紐

諸番

征緬

長河西裏管軍

達哩管軍

圖沙瑪田地

諸路萬戶府

上萬戶府管軍七千之上達魯噶齊一員萬戶一員
俱正三品虎符副萬戶一員從三品虎符

中萬戶府管軍五千之上達魯噶齊一員萬戶一員
俱從三品虎符副萬戶一員正四品金牌

下萬戶府管軍三千之上達魯噶齊一員萬戶一員
俱從三品虎符副萬戶一員從四品金牌其官皆世
襲有功則陞之每府設經歷一員從七品知事一員
從八品提控案牘一員

鎮撫司鎮撫二員蒙古漢人參用上萬戶府正五
品中萬戶府從五品俱金牌下萬戶府正六品
俱銀牌

上千戶所管軍七百之上達魯噶齊一員千戶一

員俱從四品金牌副千戶一員正五品金牌

中千戶所管軍五百之上達魯噶齊一員千戶一

員俱正五品金牌副千戶一員從五品金牌

下千戶所管軍三百之上達魯噶齊一員千戶一

員俱從五品金牌副千戶一員正六品銀牌

彈壓二員蒙古漢人參用上千戶所從八品中

下二所正九從九品內銓注

上百戶所百戶二員蒙古一員漢人一員俱從六

品銀牌

下百戶所百戶一員從七品銀牌

儒學提舉司秩從五品各處行省所署之地皆置一司
統諸路府州縣學校祭祀教養錢糧之事及考校呈進
著述文字每司提舉一員從五品副提舉一員從七品
吏目一人司吏二人

蒙古提舉學校官秩從五品提舉一員從五品同提舉
一員從七品至元十八年置唯江浙湖廣江西三省有

之餘省不置

官醫提舉司秩從六品提舉一員同提舉一員副提舉一員掌醫戶差役詞訟至元二十五年置河南江浙江西湖廣陝西五省各立一司餘省並無

兩淮都轉運鹽使司秩正三品國初兩淮內附以提舉馬里范章專掌鹽課之事至元十四年始置司于揚州使二員正三品同知一員正四品副使一員正五品運判二員正六品經歷一員從七品知事一員從八品照

磨一員從九品三十年悲罷所轄鹽司以其屬置場官
大德四年復置批驗所于真州采石等處

鹽場二十九所每場司令一員從七品司丞一員從
八品管軍一員從九品辦鹽各有差

呂四場

餘東場

餘中場

餘西場

西亭場

金沙場

石港場

掘港場

豐利場

馬塘場

拼茶場

角斜場

富安場

安豐場

梁垛場

東臺場

河埭場

丁溪場

小海場

草堰場

白駒場

劉莊場

五祐場

新興場

廟灣場

莞瀆場

板浦場

臨洪場

徐瀆浦場

批驗所每所提領一員正七品大使一員正八品副
使一員正九品掌批驗鹽引

兩浙都轉運鹽使司秩正三品使二員同知二員運判
二員經歷知事各一員照磨一員至元十四年置司杭

州大德三年定其產鹽之地立場有差仍于杭州嘉興
紹興溫台等處設檢校四所專驗鹽袋毋過常度

鹽場三十四所每所司令一員從七品司丞一員從
八品管勾一員從九品

仁和場

許村場

西路場

下沙場

青村場

表部場

浦東場

橫浦場

蘆瀝場

海沙場

鮑郎場

西興場

錢青場

三江場

曹娥場

石堰場

鳴鶴場

清泉場

長山場

穿山場

袋山場

玉泉場

蘆花場

大窩場

昌國場

永嘉場

雙穗場

天富南監

長林場

黃巖場

杜瀆場

天富北監

長亭場

龍頭場

福建等處都轉運鹽使司秩正三品使二員同知二員
運判二員經歷知事各一員照磨一員至元十四年始
置市舶司領煎鹽徵課之事二十四年改立鹽運使司

二十九年罷立提舉司大德四年復為運司九年復罷併入元帥府兼掌之十年復立都提舉司至大四年復陞運司隸行省凡置鹽七所

鹽場七所每所司令一員從七品司丞一員從八品管勾一員從九品

海口場 牛田場 上里場 惠安場

潯美場 浯州場 涵州場

廣東鹽課提舉司至元十三年始徙廣州兼辦鹽課十

六年隸江西鹽鐵茶都轉運司二十二年併入宣慰司
二十三年置市舶提舉司大德四年改廣東鹽課提舉
司提舉一員從五品同提舉一員從六品副提舉一員
從七品其屬附見

鹽場十三所每所司令一員從七品司丞一員從八
品管勾一員從九品

靖康場

歸德場

東莞場

黃田場

香山場

姓峒場

雙恩場

咸水場

添水場

石橋場

隆井場

招收場

小江場

四川茶鹽轉運司成都鹽井九十五處散在諸郡山中
至元二年置興元四川轉運司專掌煎熬辦課之事八
年罷之十六年復立轉運司十八年併入四道宣慰司
十九年復立陝西四川轉運司通轄諸課程事二十二
年置四川茶鹽運司秩從三品使一員同知副使運判
各一員經歷知事照磨各一員

鹽場一十二所每所司令一員從七品司丞一員從八品管勾一員從九品

簡鹽場

隆鹽場

綿鹽場

潼川場

遂寧場

順慶場

保寧場

嘉定場

長寧場

紹慶場

雲安場

大寧場

廣海鹽課提舉司至元三十一年置專職鹽課秩正四品都提舉二員從四品同提舉二員從五品副提舉二員從六品知事一員提控案牘一員

市舶提舉司至元二十三年立鹽課市舶提舉司隸廣東宣慰司三十年立海南博易提舉司至大四年罷之禁下番船隻元祐元年弛其禁改立泉州廣東慶元三市舶提舉司每司提舉二員從五品同提舉二員從六品副提舉二員從七品知事一員

海道運糧萬戶府至元二十年置秩正三品掌每歲海道運糧供給大都達魯噶齊一員萬戶一員並正三品副萬戶四員從三品經歷一員從七品知事一員從八

品照磨一員從九品鎮撫二員正五品其屬附見

海運千戶所秩正五品達魯噶齊一員千戶二員並
正五品副千戶三員從五品若溫台若慶元紹興若
杭州嘉興若崑山崇明常熟江陰等處凡五所而平
江又有海運香沙糯米千戶所

諸路總管府至元初置二十年定十萬戶之上者為上
路十萬戶之下者為下路當衝要者雖不及十萬戶亦
為上路上路秩正三品達魯噶齊一員總管一員並正

三品兼管勸農事江北則兼諸軍鄂囉同知治中判官
各一員下路秩從三品不置治中員而同知如治中之
秩餘悉同上至元二十三年置推官二員專治刑獄下
路一員經歷一員知事一員或二員照磨兼承發架閣
一員司吏無定制隨事繁簡以為多寡之額譯文通事
各一人其屬附見

儒學教授一員秩九品一路各設一員及學正一員
學錄一員具散府上中州亦設教授一員下州設學

正一員

蒙古教授一員正九品

醫學教授一員

陰陽教授一員

司獄司司獄一員丞一員

平淮行用庫提領大使副使各一員

織染局局使一員副使一員

雜造局大使一員副使一員

府倉大使一員副使一員

惠民藥局提領一員

稅務提領一員大使副使各一員

錄事司秩正八品凡路府所治置一司以掌城中戶
民之事中統二年詔驗民戶定為員數二千戶以上
設錄事司候判官各一員二千戶以下省判官不置
至元二十年置達魯噶齊一員省司候以判官兼捕
盜之事典史一員若城市民少則不置司歸之倚郭

縣在兩京則為警巡院獨杭州置四司後省為左右

兩司

散府秩正四品達嚕噶齊一員知府或府尹一員領勸
農鄂囉與路同同知一員判官一員推官一員知事一
員提控案牘一員所在有隸諸路及宣慰司行省者有
直隸省部者有統州縣者有不統縣者其制各有差等
諸州中統五年併立州縣未有差等至元三年定一萬
五千戶之上者為上州六千戶之上者為中州六千戶

之下者為下州江南既平二十年又定其地五萬戶之上者為上州三萬戶之上者為中州不及三萬戶者為下州於是陞縣為州者四十有四縣戶雖多附路府者不改上州達魯噶齊州尹秩從四品同知秩正六品判官秩正七品中州達魯噶齊知州並正五品同知從六品判官從七品下州達魯噶齊知州並從五品同知正七品判官正八品兼捕盜之事參佐官上州知事提控案牘各一員中州吏目提控案牘各一員下州吏目一

員或二員

諸縣至元三年合併江壯諸縣六千戶之上者為上縣二千戶之上者為中縣不及二千戶者為下縣二十年又定江淮以南三萬戶之上者為上縣一萬戶之上者為中縣一萬戶之下者為下縣上縣秩從六品達嚕噶齊一員尹一員丞一員簿一員尉一員典史二員中縣秩正七品不置丞餘悉如上縣之制下縣秩從七品置官如中縣民少事簡之地則以簿兼尉後又別置尉尉

主捕盜之事別有印典史一員

巡檢司從九品巡檢一員

諸軍唯邊遠之地有之各統屬縣其秩如下州具設官置吏亦如之

諸蠻夷長官司西南夷諸溪洞各置長官司秩如下州達魯噶齊長官副長官參用其土人為之

各處托克托和斯掌辦使臣奸偽正一員從五品副一員正七品

勲一十階

上柱國

正一品

柱國

從一品

上護軍

正二品

護軍

從二品

上輕車都尉

正三品

輕車都尉

從三品

上騎都尉

正四品

騎都尉

從四品

驍騎尉

正五品

飛騎尉

從五品

爵八等

王

正一品

郡王

從一品

國公

正二品

郡公

從二品

郡侯

正三品

郡侯

從三品

郡伯

正四品

郡伯

從四品

縣子

正五品

縣男

從五品

右勳爵若上柱國郡王國公時有除拜者餘則止於封贈用之

文散官四十二階

開府儀同三司

儀同三司

特進

崇進

金紫光祿大夫

銀青光祿大夫

以上俱正一品

光祿大夫

榮祿大夫

以上從一品

資德大夫

資政大夫

資善大夫

以上正二品

正奉大夫

通奉大夫

中奉大夫

以上從二品

正議大夫

通議大夫

嘉議大夫

太中大夫

中大夫

亞中大夫

以上從三品舊為少中延祐改亞中

中議大夫

中憲大夫

中順大夫

以上正
四品

朝請大夫

朝散大夫

朝列大夫

以上從
四品

奉政大夫

奉議大夫

以上正
五品

奉直大夫

奉訓大夫

以上從
五品

承德郎

承直郎

以上正
六品

儒林郎

承務郎

以上從
六品

文林郎

承事郎

以上正
七品

徵事郎

從事郎

以上從
七品

登仕郎

將仕郎

以上正八品

登仕佐郎

將仕佐郎

以上從八品

右文散官四十二階由一品至五品為宣授六品至九品為勅授勅授則中書署牒宣授則以制命之一品至五品者服綠六品至七品者服緋八品至九品者服綠武官以下皆如之其官常對品惟九品無散官則但舉其職而已武官雜職亦如之

武散官三十四階

龍虎衛上將軍

金吾衛上將軍

驃騎衛上將軍

以上正
二品

奉國上將軍

輔國上將軍

鎮國上將軍

以上從
二品

昭武大將軍

昭勇大將軍

昭毅大將軍

以上正
三品

安遠大將軍

定遠大將軍

懷遠大將軍

以上從
三品

廣威將軍

宣威將軍

明威將軍

以上正
四品

信武將軍

顯武將軍

宣武將軍

以上從四品

武節將軍

武德將軍

以上正五品

武義將軍

武畧將軍

以上從五品

承信校尉

昭信校尉

以上正六品

忠武校尉

忠顯校尉

以上從六品

忠畧校尉

忠靖校尉

以上正七品

修武校尉

敦武校尉

以上從七品

保義校尉

進義校尉

以上正八品

保義副尉

進義副尉

以上從八品

右武散官三十四階自龍虎衛上將軍至進義副

尉由正二品至從八品其除授具前

內侍散官一十四階

中散大夫

正二品

中引大夫

從三品

中御大夫

正三品

侍中大夫

從三品

中衛大夫

正四品

中涓大夫

從四品

通侍郎

正五品

通御郎

從五品

侍直郎

正六品

內直郎

從六品

司謁郎

正七品

司閤郎

從七品

司奉郎

正八品

司引郎

從八品

右內侍品秩一十四階自中散至司引由正二品

至從八品其餘授具前

司天散官一十四階

欽象大夫

從三品

明時大夫

頌朔大夫

以上正四品

保章大夫

從四品

司立大夫

正五品

授時郎

從五品

靈臺郎

正六品

候儀郎

從六品

司正郎

正七品

平秩郎

從七品

正紀郎

挈壺郎

以上正八品

司歷郎

司辰郎

以上從八品

右司天品秩一十四階自欽象至司辰由從三品至從八品其餘授具前

太醫散官一十五階

保宜大夫

保康大夫

以上從
三品

保安大夫

保和大夫

以上正
四品

保順大夫

從四
品

保冲大夫

正五
品

保全郎

從五
品

成安郎

正六
品

保和郎

從六
品

成全郎

正七
品

醫正郎

從七
品

醫効郎

醫候郎

以上正
八品

醫痊郎

醫愈郎

以上從
八品

右太醫品秩一十五階自保宜至醫愈亦由從三
品至從八品具除授具前

教坊司散官一十五階

雲韶大夫

僊韶大夫

以上從
三品

長寧大夫

德和大夫

以上正
四品

協律大夫

從四
品

嘉成大夫

正五
品

純和郎

從五
品

調音郎

正六
品

司樂郎

從六
品

協樂郎

正七
品

和樂郎

從七品

司音郎

司律郎

以上正八品


和聲郎

和節郎

以上從八品

右教坊品秩一十五階自雲韶至和節由從三品

至從八品其餘授具前



元史卷九十一

欽定四庫全書

史部
元史卷九十二

御史^臣徐如澍覆勘

總校官編修^臣朱鈐

欽定四庫全書

元史卷九十二

明翰林學士亞中大夫知制誥兼修國史宋濂等修

志第四十一下

百官八

元之官制其大要具見于前自元統至元以來頗有沿革增損之異至正兵興四郊多壘中書樞密俱有分省分院而行中書省行樞密院增置之外亦有分省分院

自省院以及郡縣又各有添設之員而各處總兵官以便宜行事者承制擬授具姓名以軍功奏聞則宣命勅牒隨所索而給之無有考覈其實者於是名爵日濫紀綱日紊疆宇日蹙而遂至于亡矣惜其掌故之文缺軼不完今據有司所送上者緝而載之以附前志庶覽者得以參考其得失治亂之槩云

中書省元統三年七月中書省奏請自今不置左丞相十月令巴延獨長台司詔天下至元五年十月加右丞

相已延為大丞相六年十月命托克托為右丞相復置
左丞相至正七年置議事平章四人十二年二月以賈
魯為添設左丞三月以烏蘭哈達為添設叅知政事三
月以杜秉燾為添設叅政八月以哈瑪爾為添設右丞
十三年六月命皇太子領中書令如舊制十四年九月
以呂思誠為添設左丞二十七年八月以樞密知院曼
濟為添設第三平章以太尉特哩特穆爾為添設左丞相
中書分省至正十一年置中書分省于濟寧以松壽為

叅知政事十二年二月中書右丞伊蘇烏爾圖華左丞
韓大雅開分省于彰德十四年陞濟寧分省叅政特哩
特穆爾為平章政事是後嘗置右丞以守禦焉十五年
四月彰德分省除右丞左丞各一員十七年七月以平
章達蘭叅政溫普崔敬分省陵州十一月平章藏布分
省冀寧十八年八月掃地王沙劉陷冀寧藏布遁五月
王劉北行總兵官察罕特穆爾遣索珠院判來冀寧鎮
守藏布復回十九年藏布卒二十年正月以右丞布哈

叅政王時分省冀寧三月鐵甲韓至分省官遁二十一年以平章達蘭鎮守二十二年達蘭還京師以左丞喇嘛齊拉袞叅政托果爾領分省事二十三年三月又以平章阿拉克布哈鎮之八月庫庫特穆爾兵至冀寧分省罷二十七年八月以添設平章曼濟兼知院分省保定九月命太保左丞相伊蘇統領軍馬分省山東薩蘭托里仍中書左丞相知樞密院分省大同以哈麻諾海為大同分省平章阿拉克布哈為叅政又置分省于冀

寧陞冀寧總管為叅政鑄印與之凡事必咨大同分省而後行之十月又置分省于真定

六部至元三年十二月巴延太師等奏准吏部考功郎中員外郎主事各設一員至正元年四月吏部置司績一員正七品掌百官行止以憑叙用廢襲六月中書奏准戶部事繁見設司計四員宜依前至元二十八年例添設二員十一月吏部兵刑分為二庫戶工二部分二庫各設管勾一員十二年正月刑部添設尚書侍郎郎

中員外郎各一員十五年十月濟寧分省置兵刑工戶
四部

樞密院至正元年知樞密院昂吉爾奏樞密院故事亦
設奏事平章二人有旨令復置十三年六月令皇太子
領樞密院事如舊制十五年四月添設僉院一員院判一
員

樞密分院至正十五年三月置樞密分院于衛輝四月
彰德分院添設同知副樞各一員都事一員直沽分院

各設副樞一員都事一員十六年又置分樞密院于沂州以指揮使司隸焉

太宗正府至元元年閏十二月中書省奏准世祖時立
太宗正府至仁宗時減去大字今宜遵世祖舊制仍為
太宗正府至正十年十二月太宗正府添設掌判二員
宣文閣至元六年十一月罷奎章閣學士院至正元年
九月立宣文閣不置學士唯授經郎及監書博士以宣
文閣繫銜云

崇文監至元六年十二月改藝文監為崇文監至正元年三月奉旨令翰林國史院領之

詳定使司至正十七年七月置四方獻言詳定使司正三品掌考其所陳之言擇其善者以聞于上而舉行之詳定使二員正三品副使二員正四品掌書記二員正七品中書官提調之

司禮監至正元年十二月奉旨依世祖故事復立司禮監給四品印掌師翁祭祀祈禳之事置內監少監監丞

各二員知事一員譯史令史奏差各二名自後復升為三品

延徽寺至元六年二月中書省奉旨依累朝故事起蓋伊埒哲伯皇帝鄂爾多置延徽寺以掌之

規運提典所至元六年十一月罷大禧宗禋院隆祥使司十二月申書奏以宗禋院所轄會福崇福隆禧壽福四總管所并隆祥使司俱改為規運提點所正五品仍添置萬寧提點所一處并隸宣政院

諸路寶泉都提舉司至正十年十月置其屬有鼓鑄局
正七品水利庫從七品掌鼓鑄至正銅錢印造交鈔
徽政院元統元年十二月依太皇太后故事為皇太后
置徽政院設立官屬三百六十有六員

資正院至元六年十二月中書省奉旨為諤勒哲呼圖
克皇后置資正院正二品院使六員同知僉院同僉院
判各二員首領官經歷都事各一員管勾照磨各一員
將昭功萬戶府司屬除已罷繕工司外集慶路錢糧并

入有司每年驗數撥付資正院其餘司屬並付院領之自
後正宮皇后崩冊立諤勒哲呼圖克為皇后改置崇政院
東宮官屬至正六年四月立皇太子宫傳府以長
吉等為宮傳官時太子猶未受冊寶至九年冬立端本
堂為皇太子學宮置諭德一員正二品贊善二員正三
品文學二員正五品正字二員正七品司經二員正七
品十三年六月冊立皇太子定置皇太子賓客二員正
二品左右諭德各一員從二品左右贊善各一員從二

品文學二員從五品中庶子中允各一員從六品

詹事院至正十三年六月立詹事院罷宮傅府置詹事
三員從一品同知詹事二員正二品副詹事二員從二
品詹事丞二員正三品首領官四員中議二員從五品
長史二員從六品管勾照磨各一員正八品蒙古筆且
齊六人回回掾史二人掾史十人知印克埒穆爾齊各
二人宣使十人其屬有家令司家令二員正三品二員
正四品家丞二員正五品典簿二員正七品照磨一員

正九品有府正司府正二員正二品府丞二員正五品
典簿二員從七品照磨一員正九品有典簿監典寶卿
二員正三品太監二員從三品少監二員從五品監丞
一員正五品經歷一員從七品知事一員從八品照磨
一員正九品有儀衛司指揮二員從四品副二員從五
品知事一員從八品十一月置典藏庫從五品掌收皇
太子錢帛十七年十月置分詹事院詹事一員同知副
使各一員詹事丞二員經歷二員都事二員照磨兼架

閣一員斷事官二員知事一員

大撫軍院至正二十七年八月乙巳命皇太子總天下軍馬九月皇太子置大撫軍院從一品知院四員同知二員副使一員同僉一員首領官經歷都事各二員照磨兼管勾一員二十八年閏七月詔罷之

大都督分府至正十八年三月東安瀋州柳林日有警報京師備禦四隅俱立大都督分府官吏視都府減半警巡院至正十一年七月陞左右兩巡院為正五品十

八年又於大都在城四隅各立警巡分院官吏視本院減半

行中書省至正十二年正月江西江制行省皆除添設平章陝西行省除添設右丞閏三月置淮南江北等處行中書省于揚州以淮西宣慰司兩淮鹽運司揚州淮安徐州唐州安豐蘄黃皆隸焉除平章二員右丞左丞各一員叅政二員及首領官屬等共二十五員為頭平章兼提調淮安王傅府事至十一月始鑄淮南江北等

處行中書省印給之是年江淞行省添設右丞叅政四
川行省添設叅政十六年五月置福建等處行中書省
于福州鑄印設官一如各處行省之制以江淞行中書
省平章左荅納失里南臺中丞阿嚕烏遜為福建行中書
省平章政事福建閩海道廉訪使莊嘉為右丞福建元
帥吳鐸為左丞司農丞努圖克齊益都路總官卓思誠
為叅政以九月至福州罷帥府開省署十七年九月置
山東行省以大司農哈喇章為平章政事鑄印與之十

八年福建行省右丞托迪分省建寧叅政努圖克齊分省泉州二十三年三月置廣西行中書省以廉訪使額爾吉納為平章政事又置膠東行省于萊陽總制東方事二十六年八月置福建江西等處行中書省

行樞密院至元三年巴延右丞相奏准於四川及湖廣江西之境及江浙凡三處各置行樞密院以鎮遏好亂之民每處設知院一員同知僉院院判各一員湖廣江西二省所轄地里險遠添設同僉一員各院經歷一員

都事二員照磨一員客省副使一員斷事官一員蒙古
筆且齊二人掾史六人宣使六人知印克埒穆爾齊各
一人斷事官譯史一人令史二人克埒穆爾齊知印各
一人奏差二人四年二月罷之至正十三年五月嶺北
行樞密院添設斷事官二員先已設四員共六員又立
鎮撫司除鎮撫二員立管勾所置管勾二員兼照磨後
又添設僉院二員都事一員十五年十月置淮南江北
等處行樞密院于揚州十二月河南行樞密院添設院

判二員十六年三月置江漕行樞密院于杭州知院二員同知二員副樞二員僉院二員同僉二員院判二員首領官經歷知事各一員斷事官一員經歷一員十八年以叅政崔敬為山東等處行樞密院副使分院於漕州兼領屯田事十九年八月以察罕特穆爾為河南行省平章政事兼河南山東等處行樞密院知院二十六年八月置福建江西等處行樞密院

行御史臺至正十六年九月二十八日命太尉納琳為

江南諸道行御史臺御史大夫以次官員各依等第選用是日御史臺奉旨移置行臺于紹興十二月合臺官屬開臺署事是年置河南廉訪司于沂州十八年御史臺奏准江西湖東道肅政廉訪司權於建寧路開司署事二十二年九月權置山北廉訪司於惠州二十三年六月濟南路復置肅政廉訪司二十五年閏十月御史大夫鄂勒哲特穆爾奏江南諸道行御史臺衙門嘗奉旨於紹興路開設近因道梗湖南湖北廣東廣西海北

江西福建等處凡有文書北至南臺風信不便徑申內臺未委事情虛實宜於福建置分臺給降印信俾湖南湖北廣東廣西海北江南福建各道文書由分臺以達內臺於事體為便有旨從之十一月仍置河東廉訪司于冀寧

行宣政院元統二年正月革罷廣教總管府一十六處置行宣政院于杭州除院使二員同知二員副使二員同僉院判各一員首領官經歷二員都事知事照磨各

一員令史八人譯史二人宣使八人至元二年五月西
番寇起置行宣政院以額森特穆爾為院使往討之至
正二年江潮行宣政院設崇教所儼行中書省理問官
秩四品以理僧民之事

河南山東都水監至正六年五月以連年河決為患置
都水監以專疏塞之任

行都水監至正八年二月河水為患詔於濟寧鄆城立
行都水監九年又立山東河南等處行都水監十一年

十二月立河防提舉司隸行都水監掌巡視河道從五
品十二年正月行都水監添設判官二員十六年正月
又添設少監監丞知事各一員

都水庸田使司至元二年正月置都水庸田使司于平
江既而罷之至五年復立至正十二年因海運不通京
師闕食詔河南窪下水泊之地置屯田八處於汴梁添
設都水庸田使司正三品掌種植稻田之事庸田使二
員副使二員僉事三員首領官經歷知事照磨各一員

司吏十二人譯史二人

都總制庸田使司至正十年置河南江北等處都總制
庸田使司定置都總制庸田使二員從二品副使二員
從三品僉事六員從四品首領官經歷二員從六品都
事二員從七品照磨兼管勾承發架閣一員從八品蒙
古筆且齊回回令史克埒穆爾齊知印各一員令史十
八人宣使十八人壕寨十八人典吏四人屬官則有軍
民屯田總管府凡五處置達嚕噶齊各一員從三品總

管各一員正五品同知各一員正六品府判各一員從七品首領官經歷各一員從八品知事各一員從九品提控案牘兼管勾承發架閣各一員蒙古譯史各一人司吏各六人典史各二人又有農政司置農政一員正五品農丞一員正八品大使副使各一員正九品豐盈庫置提領一員正八品大使副使各一員正九品

分司農司至正十三年正月命中書左丞烏蘭哈達左丞烏克遜良楨兼大司農卿給分司農司印西自西山

南至保定河間北至檀順州東至遷民鎮凡係官地及元管各處屯田悉從分司農司立法募民佃種之

大兵農司至正十五年詔有水田去處置大兵農司招誘夫丁有事則乘機招討無事則栽植播種所置司之處曰保定等處大兵農使司河間等處大兵農使司武清等處大兵農使司景蓊等處大兵農使司其屬有兵農千戶所共二十四處百戶所共四十八處鎮撫司各一人

大都督兵農司至正十九年二月置大都督兵農司于西京以博囉特穆爾領之從其所請也仍置分司十道專掌屯種之事

茶運司元統元年十一月復置湖廣江西等處都轉運司

鹽運司至正二年十一月中書省奉旨講究鹽法奏准於杭州嘉興紹興溫台四處各處檢校批驗所直隸運司專掌批驗鹽商引目均平袋法稱盤等事每所置檢

校批驗官一員從六品相副官一員正七品

漕運司至元二年五月京畿都漕運司添設提調官運副運判各一員九年添設海道巡防官給降正七品印信掌統領軍人水手防護糧船巡防官二員相副官二員

防禦海道運糧萬戶府至正十五年七月陞台州海道巡防千戶所為防禦海道運糧萬戶府九月置分府于平江

添設兵馬司至正十年十月中書省奏東南千重外妖
氣見合立兵馬司四處掌防禦之職遂置大名兵馬司
東平兵馬司濟南兵馬司徐州兵馬司每司置都指揮
指揮各二員副指揮各四員經歷知事提控案牘各一
員譯使各二人司吏各十二人奏差各八人貼書各二
十四人呼拉干齊各三十人司獄各一員獄丞各一員
十一年罷沂州分元帥府改立兵馬指揮使司十五年
十月濟寧兵馬司添設副指揮一員

各處寶泉提舉司至正十一年十月置寶泉提舉司于河南行省及濟南冀寧等處凡九所江淞江西湖廣行省各一所十二年三月置銅臺場于饒州路德興縣信州路鉛山州韶州岑水凡三處每所置提領一員正八品大使一員從八品副使一員正九品流官內銓注直隸寶泉提舉司掌浸銅事

湖南道宣慰使司都元帥府至元元年六月奏准湖南道宣慰使司兼都元帥府總領所轄路分鎮守萬戶軍

馬

邦牙等處宣慰使司都元帥府至正四年十二月置先是
以緬地至雲南極邊就立其酋長為元帥年一貢方
物至是來貢故改立官府以獎異之

永昌等處宣慰使司都元帥府至正三年七月中書省
奏奎騰阿哈所分地方接連西番自托克托穆爾既沒
之後無人承嗣達勒達人畜時被西番劫奪殺傷深為
未便遂定置永昌等處宣慰使司都元帥府以治之置

宣慰司三員同知二員副使二員首領官經歷知事照磨各一員令史十人蒙古譯史四人知印二人克埒穆爾齊一人奏差八人典吏二人

山東東西道宣慰使司都元帥府至正六年十二月改立掌開設屯田駐軍馬之事

荆湖北道宣慰使司都元帥府至正十一年十一月奏准荆湖北道宣慰使司兼都元帥府

湖東宣慰司至正十二年正月添設宣慰使一員同知

一員都事二員

淮東等處宣慰使司都元帥府至正十五年二月置統
率濠泗義兵萬戶府并洪澤等處義兵招誘富民出丁
壯五千名者為萬戶五百名者為千戶一百名者為百
戶降宣勅牌面與之命置司于泗州天長縣

興元等處宣慰使司都元帥府至正十五年十二月置
江州等處宣慰使司都元帥府至正十六年九月奏准
宣慰使都元帥廷授佐貳僚屬命江西行省平章政事

道通和尼齊承制署之

河南宣慰司至正十九年十月罷洛陽招討軍民萬戶府置宣慰司以張俊為宣慰使

東路蒙古軍都元帥府至正八年正月置

分元帥府至正八年三月以福建盜起詔汀漳二州特立分元帥府以討捕之十一月命瑪勒岱開分元帥府于沂州以鎮禦東海羣盜十一年正月湖南寶慶路置分元帥府又置寶武分元帥府三月置山東分元帥府

于登州提調登萊寧海三州三十六處海口事十二年
二月置安東安豐二處分元帥府

水軍元帥府至正二十六年二月置河淮水軍元帥府
于孟津縣

紹熙軍民宣撫司至元四年因監察御史言四川在宋
時有紹熙一府統六州二十縣一百五十二鎮近年雍
梁淮甸人民見彼中田疇廣濶開墾成業者凡二十餘
萬戶省部議定遂奏准置紹熙等處軍民宣撫司正官六

員宣撫司同知副使各二員首領官二員經歷知事提
控案牘各一員司獄一員蒙古儒學教授各一員令史
八人譯使知印克埒穆爾齊各一人奏差四人所隸資
普昌隆下州四處盤石內江安岳昌元貴平下縣五處
巡檢司一十三處各設官如制又置都總使司命御史
大夫托克托兼都總使治書侍御史吉達布為副都總
使六年十一月中書省又因臺臣言裁減冗官事遂罷
紹熙軍民宣撫司

永順宣撫司至正十一年四月改陞永順安撫司為宣撫司

平緬宣撫司至正十五年八月以雲南死可伐等降令其子莽三入貢方物乃置平緬宣撫司以羈縻之

忠孝軍民安撫司至正十一年七月革罷四川省所轄大奴管勾等洞長官司立忠孝軍民府至十五年四月詔改為忠孝軍民安撫司

忠義軍民安撫司至正十五年四月罷四川羊母甲洞

臬南王洞長官司置忠義軍民安撫司又罷盤順府置盤順軍民安撫司

宣化鎮南五路軍民府至正十五年四月命於四川置立提調軍民鎮撫所蠻夷軍民千戶所

團練安撫勸農使司至正十八年九月置奉元延安等處團練安撫勸農使司于耀州鞏昌等處團練安撫勸農使司于邠州以行省丞相托多行臺大夫鄂勒哲特穆爾領之各設參謀一人每道置使二人同知副使各

二人檢督六人經歷知事照磨各一人

防禦使至正十七年正月准山東分省資團給義兵每
州添設州判一員每縣添設主簿一員詔有司正官俱
兼防禦使司聽宣慰使司節制

屯田使司至正十五年十二月置軍民屯田使司于沛
縣正三品

屯田打捕總管府至元四年五月陞兩淮屯田打捕總
管府為正三品

黎兵萬戶府元統二年十月湖廣行省咨海南僻在極
邊南接占城西隣交趾環海四千餘里中盤百洞黎獠
雜居宜改萬戶府以鎮之中書省奏准依廣西屯田萬
戶府例置黎兵萬戶府萬戶三員正三品千戶所一十
三處正五品每所領百戶所八處正七品

水軍萬戶府至正十三年十月置水軍都萬戶府于崑
山州以淛東宣慰使納琳哈喇為正萬戶宣慰使董搏
霄為副萬戶十四年二月立鎮江水軍萬戶府命江淛

行省右丞佛嘉律領之十五年十月置水軍萬戶府于
黃河小清河口

義兵萬戶府至正十四年二月詔河南淮南兩省並立
義兵萬戶府五月置南陽鄧州等處毛胡蘆義兵萬戶
府募土人為軍免其差役令討賊自効先是鄉人自相
團結號毛胡蘆故因以名之十五年四月置汴梁等處
義兵萬戶府十二月置忠義忠勤萬戶府于宿州及武

安州

招討軍民萬戶府至正二十年以鞏縣為招討軍民萬戶府二十六年三月置嵩州軍民招討萬戶府

義兵千戶所至正十年七月中書奏准于廣西平樂等古城竹山院桑江隘尊化鄉刺場嶺湖南道州路武岡路湖北靖州路等處置義兵千戶所每所置千戶一員彈壓一員百戶十員仍於義兵內推選才勇功能充千

戶彈壓百戶之職首領官都目各一員於本省都吏目內選注授並從本道帥府節制湖南道州二處千戶所

於帥府分司處設立本司調遣湖北靖州一處從本省
標撥鎮守調遣總定九十六員給降宣勅牌面印信十
三年十一月立義兵千戶水軍千戶于江西

奉使宣撫至正五年十月遣官分道奉使宣撫布宣德
意詢民疾苦疏滌冤滯蠲除煩苛體察官吏賢否明加
黜陟有罪者四品以上停職申請五品以下就便處決
民間一切興利除害之事悉聽舉行其必合上聞者條
具入告兩湖江東道以江西行省左丞和爾多卜丹吏

部尚書何執禮為之宣政院都事吳密為首領官江西
福建道以雲南右丞薩克繖匠作院使王士弘為之國
子典簿孟昉為首領官江南湖廣道以大都路達魯噶
齊巴克實江淞參政秦從德為之留守司都事烏呼納
為首領官海北廣東道以平江路達魯噶齊遵達實哩
都水使賈惟貞為之都水照磨楊文在為首領官燕南
山東道以資正院使曼濟兵部尚書李獻為之太醫院
都事賈魯為首領官河東陝西道以兵部尚書布哈樞

密院判官靳義為之翰林應奉王繼善為首領官山北
遼東道以宣政院同知伯嘉努宣徽僉院王伊蘇岱爾
為之工部主事莽賚布哈為首領官雲南省以荆湖宣
慰阿齊拉兩湖鹽運使杜德遠為之通政院都事楊矩
為首領官甘肅永昌道以上都留守阿雅噶齊陝西行
省左丞王紳為之沁源尹喬遜為首領官四川省以大
都留守達爾瑪實哩河南參政王守誠為之宣政院都
事武祺為首領官京畿道以西臺中丞定定集賢侍講

學士蘇天爵為之太史院都事留思誠為首領官河南江北道以吏部尚書達繼宣政院僉院魏景道為之中書檢校哈喇丹為首領官至正十七年九月詔以中書左丞額森布哈御史中丞成遵奉使宣撫彰德大名廣平東昌東平曹濮等處獎厲將帥

經畧使至正十八年九月初六日命經畧使問民疾苦招諭叛逆果有怙終不悛總督一應大小官吏治兵裒粟精練士卒審用成算申明紀律先定江西湖廣江淞

福建諸處併力犄角務收平復之効不尚屠戮之威江南各省義民忠君親上姓名不上達者宜優加撫存量才驗功授以官爵旌表孝子順孫義夫節婦高年耆德常令有司存恤鰥寡孤獨選官二員為經畧使叅謀官辟名士一人掌案牘設行軍兵馬司一員秩正五品掌軍律

欽定四庫全書

元史卷九十三

明翰林學士亞中大夫知制誥兼修國史宋濂等修

志第四十二

食貨一

洪範八政食為首而貨次之蓋食貨者養生之源也民非食貨則無以為生國非食貨則無以為用是以古之善治其國者不能無取於民亦未嘗過取於民其大要

在乎量入為出而已傳曰生財有大道生之者衆食之者寡為之者疾用之者舒此先王理財之道也後世則不然以漢唐宋觀之當其立國之初亦頗有成法及數傳之後驕侈生焉往往取之無度用之無節於是漢有告緡算舟車之令唐有借商稅間架之法宋有經總制二錢皆培民以充國卒之民困而國亡可歎也已元初取民未有定制及世祖立法一本於寬其用之也於宗戚則有歲賜於凶荒則有賑恤大率以親親愛民為重

而尤惓惓於農桑一事可謂知理財之本者矣世祖嘗語中書省臣曰凡賜與雖有朕命中書其斟酌之成宗亦嘗謂丞相鄂勒哲等曰每歲天下金銀鈔幣所入幾何諸王駙馬賜與及一切營建所出幾何其會計以聞鄂勒哲對曰歲入之數金一萬九千兩銀千萬兩鈔三百六十萬錠猶不足用入於至元鈔本中借二十萬錠矣自今敢以節用為請帝嘉納焉世稱元之治以至元大德為首者蓋以此自時厥後國用寔廣除稅糧科差

二者之外凡課之入日增月益至于天厯之際視至元大德之數蓋增二十倍矣而朝廷未嘗有一日之蓄則以其不能量入為出故也雖然前代告緡借商經總等制元皆無之亦可謂寬矣其能兼有四海傳及百年者有以也夫故倣前史之法取其出入之制可考者一曰經理二曰農桑三曰稅糧四曰科差五曰海運六曰鈔法七曰歲課八曰鹽法九曰茶法十曰酒醋課十有一曰商稅十有二曰市舶十有三曰額外課十有四曰歲

賜十有五曰俸秩十有六曰常平義倉十有七曰惠民藥局十有八曰市糴十有九曰賑卹具著於篇作食貨志

經理

經界廢而後有經理魯之履畝漢之覈田皆其制也夫民之强者田多而稅少弱者產去而稅存非經理固無以去其害然經理之制苟有不善則其害又將有甚焉者矣仁宗延祐元年平章章律言經理大事世祖已嘗

行之但其間欺隱尚多未能盡實以熟田為荒地者有之懼差而析戶者有之富民買貧民田而仍其舊名輸稅者亦有之由是歲入不增小民告病若行經理之法俾有田之家及各位下寺觀學校財賦等田一切從實自首庶幾稅入無隱差徭亦均於是遣官經理以章律等往江浙尚書鼐智密鼎等往江西左丞陳士英等往河南仍命行御史臺分臺鎮遏樞密院以軍防護焉其法先期揭榜示民限四十日以其家所有田自實於官

或以熟為荒以田為蕩或隱占逃亡之產或盜官田為
民田指民田為官田及僧道以田作弊者並許諸人首
告十畝以下其田主及管幹佃戶皆杖七十七二十畝
以下加一等一百畝以下一百七以上流竄北邊所隱
田沒官郡縣正官不為查勘致有脫漏者量事論罪重
者除名此其大畧也然期限猝迫貪刻用事富民黠吏
並緣為姦以無為有虛具於籍者往往有之於是人不
聊生盜賊並起其弊反有甚於前者仁宗知之明年遂

下詔免三省自實田租二年時汴梁路總管塔爾海亦
言其弊乃命河南自實田自延祐五年為始每畝止科
其半汴梁路凡減二十二萬餘石至泰定天曆之初又
盡革虛增之數民始獲安今取其數之可考者列於后
云

河南省總計官民荒熟田一百一十八萬七百六十
九頃

江西省總計官民荒熟田四十七萬四千六百九十

三項

江浙省總計官民荒熟田九十九萬五千八十一頃

農桑

農桑王政之本也太祖起朔方其俗不待蠶而衣不待耕而食初無所事焉世祖即位之初首詔天下國以民為本民以衣食為本衣食以農桑為本於是頒農桑輯要之書於民俾民崇本抑末其睿見英識與古先帝王無異豈遽金所能比哉中統元年命各路宣撫司擇通

曉農事者充隨處勸農官二年立勸農司以陳邃崔斌等八人為使至元七年立司農司以左丞張文謙為卿司農司之設專掌農桑水利仍分布勸農官及知水利者巡行郡邑察舉勤惰所在牧民長官提點農事歲終第其成否轉申司農司及戶部秩滿之日注於解由戶部照之以為殿最又命提刑按察司加體察焉其法可謂至矣是年又頒農桑之制一十四條條多不能盡載載其所可法者縣邑所屬村疇凡五十家立一社擇高

年曉農事者一人為之長增至百家者別設長一員不
及五十家者與近村合為一社地遠人稀不能相合各
自為社者聽其合為社者仍擇數村之中立社長官司
長以教督農桑為事凡種田者立牌櫪於田側書集社
某人於其上社長以時點視勸誠不率教者籍其姓名
以授提點官責之其有不敬父兄及兇惡者亦然仍大
書其所犯於門俟其改過自新乃毀如終歲不改罰其
代充本社夫役社中有疾病凶喪之家不能耕種者衆

為合力助之一社之中災病多者兩社助之凡為長者復其身郡縣官不得以社長與科差事農桑之術以備旱暵為先凡河渠之利委本處正官一員以時濬治或民力不足者提舉河渠官相其輕重官為導之地高水不能上者命造水車貧不能造者官具材木給之俟秋成之後驗使水之家俾均輸其直田無水者鑿井井深不能得水者聽種區田其有水田者不必區種仍以區田之法散諸農民種植之制每丁歲種桑棗二十株土

性不宜者聽種榆柳等其數亦如之種雜果者每丁十株皆以生成為數願多種者聽其無地及有疾者不與所在官司申報不實者罪之仍令各社布種苜蓿以防饑年近水之家又許鑿池養魚并鵝鴨之數及種蒔蓮藕雞頭菱芡蒲葦等以助衣食凡荒閒之地悉以付民先給貧者次及餘戶每年十月令州縣正官一員巡視境內有蝗蟲遺子之地多方設法除之其用心周悉若此亦仁矣哉九年命勸農官舉察勤惰於是高唐州官

以勤陞秩河南陝縣尹王仔以惰降職自是每歲申明其制十年令特默齊隨處入社與編民等二十五年立行大司農司及營田司於江南二十八年頒農桑雜令是年又以江南長吏勸課擾民罷其親行之制命止移文諭之二十九年以勸農司併入各道肅政廉訪司增僉事二員兼察農事是年八月又命提調農桑官帳冊有差者驗數罰俸故終世祖之世家給人足天下為戶凡一千一百六十三萬三千二百八十一為口凡五千

三百六十五萬四千三百三十七比其敦本之明效可
睹也已成宗大德元年罷妨農之役十一年申擾農之
禁力田者有賞游惰者有罰縱畜牧損禾稼桑聚者責
其償而後罪之由是大德之治幾於至元然旱暵霖雨
之災迭見饑毀薦臻民之流移失業者亦已多矣武宗
至大二年淮西廉訪僉事苗好謙獻種蒔之法其說分
農民為三等上戶地一十畝中戶五畝下戶三畝或一
畝皆築垣墻圍之以時收採桑椹依法種植武宗善而

行之其法出齊民要術等書茲不備錄三年申命大司
農總挈天下農政修明勸課之令除牧養之地其餘聽
民秋耕仁宗皇慶二年復申秋耕之令惟大都等五路
許耕其半蓋秋耕之利掩陽氣於地中蝗蝻遺種皆為
日所曝死次年所種必盛於常禾也延祐三年以好謙
所至植桑皆有成效於是風示諸道命以為式是年十
一月令各社出地共蒔桑苗以社長領之分給各社四
年又以社桑分給不便令民各畦種之法雖屢變而有

司不能悉遵上意大率視為具文而已五年大司農司臣言廉訪司所具栽植之數書於冊者類多不實觀此則情於勸課者又不獨有司為然也致和之後莫不申明農桑之令天歷二年各道廉訪司所察勤官內丘何主簿等凡六人情官濮陽裴縣尹等凡四人其可考者蓋止於此云

稅糧

元之取民大率以唐為法其取於內郡者曰丁稅曰地

稅此倣唐之租庸調也取於江南者曰秋稅曰夏稅此倣唐之兩稅也丁稅地稅之法自太宗始行之初太宗每戶科粟二石後又以兵食不足增為四石至丙申年乃定科徵之法令諸路驗民戶成丁之數每丁歲科粟一石驅丁五升新戶丁驅各半之老幼不與其間有耕種者或驗其牛具之數或驗其土地之等徵焉丁稅少而地稅多者納地稅地稅少而丁稅多者納丁稅工匠僧道驗地官吏商賈驗丁虛配不實者杖七十徒二年

仍命歲書其數於冊由課稅所申省以聞違者各杖一
百逮及世祖申明舊制於是輸納之期收受之式關防
之禁會計之法莫不備焉中統二年遠倉之糧命止於
沿河近倉輸納每石帶收腳錢中統鈔三錢或民戶赴
河倉輸納者每石折輸輕齎中統鈔七錢五年詔僧道
伊魯勒昆達實密儒人凡耕者白地每畝輸稅三升水
地畝五升軍站戶除地四頃免稅餘悉徵之至元三年
詔窩戶耕他所者其丁稅於附籍之郡驗丁而科地稅

於種田之所驗地而取散戶逃於河南等路者依見戶
納稅八年又定西夏中興路西寧州烏梁海三處之稅
其數與前僧道同十七年遂命戶部大定諸例全科戶
丁稅每丁粟三石驅丁粟一石地稅每畝粟三升減半
科戶丁稅每丁粟一石新收交參戶第一年五斗第二
年七斗五升第三年一石二斗五升第四年一石五斗
第五年一石七斗五升第六年入丁稅協濟戶丁稅每
丁粟一石地稅每畝粟三升隨路近倉輸粟遠倉每粟

一石折納輕齋鈔二兩富戶輸遠倉下戶輸近倉郡縣各差正官一員部之每石帶納鼠耗三升分例四升凡糧到倉以時收受出給朱錢權勢之徒結攬稅石者罪之仍令倍輸其數倉官攢典斗脚人等飛鈔作幣者並置諸法輪納之期分為三限初限十月中限十一月末限十二月違者初犯笞四十再犯杖八十成宗大德六年申明稅糧條例復定上都河間輸納之期上都初限次年五月中限六月末限七月河間初限九月中限十

月末限十一月秋稅夏稅之法行於江南初世祖平宋時除江東浙西其餘獨徵秋稅而已至元十九年用姚元之請命江南稅糧依宋舊例折輸綿絹雜物是年二月又用耿左丞言命輸粟三之一餘並入鈔以折焉以七百萬錠為率歲得羨鈔十四萬錠其輸米者止用宋斗斛蓋以宋一石當今七斗故也二十八年又命江淮寺觀田宋舊有者免租續置者輸稅其法亦可謂寬矣成宗元貞二年始定徵江南夏稅之制於是秋稅止命

輸租夏稅則輸以木綿布絹絲綿等物其所輸之數視糧以為差糧一石或輸鈔三貫二貫一貫或一貫五百文一貫七百文輸三貫者若江浙省婺州等路江西省龍興等路是已輸二貫者若福建省泉州等五路是已輸一貫五百文者若江浙省紹興路福建省漳州等五路是已皆因其地理之宜人民之衆酌其中數而取之其折輸之物各隨時估之高下以為直獨湖廣則異於是初阿爾哈雅克湖廣時罷宋夏稅依中原例改科門

攤每戶一貫二錢蓋視夏稅增鈔五萬餘錠矣大德二年宣慰張國紀請科夏稅於是湖湘重罹其害俄詔罷之三年又改門攤為夏稅而併徵之每石計三貫四錢之上視江浙江西為差重云其在官之田許民佃種輸租江北兩淮等處荒閒之地第三年始輸大德四年又以地廣人稀更優一年令第四年納稅凡官田夏稅皆不科泰定之初又有所謂助役糧者其法命江南民戶有田一頃之上者於所輸稅外每頃量出助役之田具

書於冊里正以次掌之歲收其入以助充役之費凡寺觀田除宋舊額其餘亦驗其多寡令出田助役焉民賴以不困因并著於此云

天下歲入糧數總計一千二百一十一萬四千七百八石腹裏二百二十七萬一千四百四十九石

行省九百八十四萬三千二百五十五石遼陽省七萬二千六十六石河南省二百五十九萬一千二百六十九石陝西省二十二萬九千二十三石四川省

一十一萬六千五百七十四石甘肅省六萬五百八十六石雲南省二十七萬七千七百一十九石江浙省四百四十九萬四千七百八十三石江西省一百一十五萬七千四百四十八石湖廣省八十四萬三千七百八十七石

江南三省天歷元年夏稅鈔數總計中統鈔一十四萬九千二百七十三錠三十三貫

江浙省五萬七千八百三十錠四十貫

江西省五萬二千八百九十五錠一十一貫

湖廣省一萬九千三百七十八錠二貫

科差

科差之名有二曰絲料曰包銀其法各驗其戶之上下而科焉絲料之法太宗丙申年始行之每二戶出絲一斤并隨路絲線顏色輸于官五戶出絲一斤并隨路絲線顏色輸于本位包銀之法憲宗乙卯年始定之初漢民科納包銀六兩至是止徵四兩二兩輸銀二兩折收

絲絹顏色等物逮及世祖而其制益詳中統元年立十
路宣撫司定戶籍科差條例然其戶大抵不一有元管
戶交參戶漏籍戶協濟戶於諸戶之中又有絲銀全科
戶減半科戶止納絲戶止納鈔戶外又有攤絲戶諸伊
蘇岱爾所管納絲戶復業戶并漸成丁戶戶既不等數
亦不同元管戶內絲銀全科係官戶每戶輸係官絲一
斤六兩四錢包銀四兩全科係官五戶絲戶每戶輸係
官絲一斤五戶絲六兩四錢包銀之數與係官戶同減

半科戶每戶輸係官絲八兩五戶絲三兩二錢包銀二兩止納係官絲戶若上都隆興西京等路十戶十斤者每戶輸一斤大都以南等路十戶十四斤者每戶輸一斤六兩四錢止納係官五戶絲戶每戶輸係官絲一斤五戶絲六兩四錢交參戶內絲銀戶每戶輸係官絲一斤六兩四錢包銀四兩漏籍戶內止納絲戶每戶輸絲之數與交參絲銀戶同止納鈔戶初年科包銀一兩五錢次年遞增五錢增至四兩併科絲料協濟戶內絲銀

戶每戶輸係官絲十兩二錢包銀四兩止納絲戶每戶輸係官絲之數與絲銀戶同攤絲銀每戶科攤絲四斤諸伊蘇岱爾所管戶每戶科細絲其數與攤絲同復業戶并漸成丁戶初年免科第二年減半第三年全科與舊戶等然絲料包銀之外又有俸鈔之科其法亦以戶之高下為等全科戶輸一兩減半戶輸五錢於是以全科之數作大門攤分為三限輸納被災之地聽輸他物折焉其物各以時估為則凡儒士及軍站僧道等戶皆

不與二年復定科差之期絲料限八月包銀初限八月
中限十月末限十二月三年又命絲料無過七月包銀
無過九月及平江南其制益廣至元二十八年以至元
新格定科差法諸差稅皆司縣正官監視人吏置局均
科諸夫役皆先富強後貧弱貧富等者先多丁後少丁
成宗大德六年又命止輸絲戶每戶科俸鈔中統鈔一
兩包銀戶每戶科二錢五分攤絲戶每戶科攤絲五斤
八兩絲料限八月包銀俸鈔限九月布限十月大率因

世祖之舊而增損云

科差總數

中統四年絲七十一萬二千一百七十一斤鈔五萬
六千一百五十八錠

至元二年絲九十八萬六千九百一十二斤包銀等
鈔五萬六千八百七十四錠布八萬五千四百一十
二匹

至元三年絲一百五萬三千二百二十六斤包銀等

鈔五萬九千八十五錠

至元四年絲一百九萬六千四百八十九斤鈔七萬
八千一百二十六錠

天歷元年包銀差發鈔九百八十九錠貳一百一十
三萬三千一百一十九索絲一百九萬八千八百四
十三斤絹三十五萬五百三十匹綿七萬二千一十
五斤布二十一萬一千二百二十三匹

海運

元都于燕去江南極遠而百司庶府之繁衛士編民之衆無不仰給於江南自丞相巴延獻海運之言而江南之糧分為春夏二運蓋至于京師者一歲多至三百萬餘石民無輓輸之勞國有儲蓄之富豈非一代之良法歟初巴延平江南時嘗命張瑄朱清等以宋庫藏圖籍自崇明州從海道載入京師而運糧則自浙西涉江入淮由黃河逆水至中灤旱站陸運至淇門入御河以達于京後又開濟州泗河自淮至新開河由大清河至利

津河入海因海口沙壅又從東阿旱站運至臨清入御河又開膠萊河道通海勞費不貲卒無成效至元十九年巴延追憶海道載宋圖籍之事以為海運可行於是請於朝廷命上海總管羅璧朱清張瑄等造平底海船六十艘運糧四萬六千餘石從海道至京師然朔行海洋沿山求喫風信失時明年始至直沽時朝廷未知其利是年十二月立京畿江淮都漕運司二仍各置分司以督綱運每歲令江淮漕運司運糧至中灤京畿漕運

司自中灤運至大都二十年又用王積翁議令阿巴齊等廣開新河然新河候潮以入船多損壞民亦苦之而孟古岱言海運之舟悉皆至焉於是罷新開河頗事海運立萬戶府二以朱清為中萬戶張瑄為千戶孟古岱為萬戶府達魯噶齊未幾又分新河軍士水手及船於揚州平灤兩處運糧命三省造船二千艘於濟州河運糧猶未專於海道也二十四年始立行泉府司專掌海運增置萬戶府二總為四府是年遂罷東平河運糧二

十五年内外分置漕運司二其在外者於河西務置司
領接運海道糧事二十八年又用朱清張瑄之請併四
府為都漕運萬戶府二止令清瑄二人掌之其屬有千
戶百戶等官分為各翼以督歲運至大四年遣官至江
浙議海運事時江東寧國池饒建康等處運糧率令海
船從洋子江逆流而上江水湍急又多石磯走沙漲淺
糧船俱壞歲歲有之又湖廣江西之糧運至真州泊入
海船船大底小亦非江中所宜於是以嘉興松江秋糧

并江淮江浙財賦府歲辦糧充運海漕之利益至是博
矣凡運糧每石有腳價鈔至元二十一年給中統鈔八
兩五錢其後遞減至於六兩五錢至大三年以福建浙
東船戶至平江載糧者道遠費廣通增為至元鈔一兩
六錢香糯一兩七錢四年又增為二兩香糯二兩八錢
稻穀一兩四錢延祐元年斟酌遠近復增其價福建船
運糙粳米每石一十三兩溫台慶元船運糙粳香糯每
石一十兩五錢紹興浙西船每石一十一兩白粳價同

稻穀每石八兩黑豆每石依糙白糧例給焉初海運之道自平江劉家港入海經揚州路通州海門縣黃連沙頭萬里長灘開洋沿山嶼而行抵淮安路鹽城縣歷西海州海寧府東海縣密州膠州界放靈山洋投東北路多淺沙行月餘始抵成山計其水程自上海至楊村馬頭凡一萬三千三百五十里至元二十九年朱清等言其路險惡復開生道自劉家港開洋至撐腳沙轉沙嘴至三沙洋子江過匾檐沙大洪又過萬里長灘放大洋

至青水洋又經黑水洋至成山過劉島至之罘沙門二島放萊州大洋抵界河口其道差為徑直明年千戶殷明畧又開新道從劉家港入海至崇明州三沙放洋向東行入黑水大洋取成山轉西至劉家島又至登州沙門島於萊州大洋入界河當舟行風信有時自浙西至京師不過旬日而已視前二道為最便云然風濤不測糧船漂溺者無歲無之間亦有船壞而棄其米者至元二十三年始責償於運官人船俱溺者乃免然視河漕

之費則其所得益多矣

歲運之數

至元二十年四萬六千五十石至者四萬二千一百
七十二石 二十一年二十九萬五百石至者二十
七萬五千六百一十石 二十二年一十萬石至者
九萬七百七十一石 二十三年五十七萬八千五
百二十石至者四十三萬三千九百五十石 二十四
年三十萬石至者二十九萬七千五百四十六石

二十五年四十萬石至者三十九萬七千六百五十
五石 二十六年九十三萬五千石至者九十一萬
九千九百四十三石 二十七年一百五十九萬五
千石至者一百五十一萬三千八百五十六石 二
十八年一百五十二萬七千一百五十石至者一百
二十八萬一千六百一十五石 二十九年一百四
十萬七千四百石至者一百三十六萬一千五百一
十三石 三十年九十萬八千石至者八十八萬七

千五百九十一石 三十一年五十一萬四千五百
三十三石至者五十萬三千五百三十四石 元貞
元年三十四萬五百石 二年三十四萬五百石至
者三十三萬七千二十六石 大德元年六十五萬
八千三百石至者六十四萬八千一百三十六石
二年七十四萬二千七百五十一石至者七十萬五
千九百五十四石 三年七十九萬四千五百石
四年七十九萬五千五百石至者七十八萬八千九

百一十八石 五年七十九萬六千五百二十八石
至者七十六萬九千六百五十石 六年一百三十
八萬三千八百八十三石至者一百三十二萬九千
一百四十八石 七年一百六十五萬九千四百九
十一石至者一百六十二萬八千五百八石 八年
一百六十七萬二千九百九石至者一百六十六萬
三千三百一十三石 九年一百八十四萬三千三
石至者一百七十九萬五千三百四十七石 十年

一百八十萬八千一百九十九石至者一百七十九
萬七千七十八石 十一年一百六十六萬五千四
百二十二石至者一百六十四萬四千六百七十九
石 至大元年一百二十四萬一百四十八石至者
一百二十萬二千五百三石 二年二百四十六萬
四千二百四石至者二百三十八萬六千三百石
三年二百九十二萬六千五百三十二石至者一百
七十一萬六千九百十三石 四年二百八十七萬

三千二百一十二石至者二百七十七萬三千二百六十六石 皇慶元年二百八萬三千五百五石至者二百六萬七千六百七十二石 二年二百三十一萬七千二百二十八石至者二百一十五萬八千六百八十五石 延祐元年二百四十萬三千二百六十四石至者二百三十五萬六千六百六石 二年二百四十三萬五千六百八十五石至者二百四十二萬二千五百五石 三年二百四十五萬八千

五百一十四石至者二百四十三萬七千七百四十
一石 四年二百三十七萬五千三百四十五石至
者二百三十六萬八千一百一十九石 五年二百
五十五萬三千七百一十四石至者二百五十四萬
三千六百一十一石 六年三百二萬一千五百八
十五石至者二百九十八萬六千一十七石 七年
三百二十六萬四千六石至者三百二十四萬七千
九百二十八石 至治元年三百二十六萬九千四

百五十一石至者三百二十三萬八千七百六十五石 二年三百二十五萬一千一百四十石至者三百二十四萬六千四百八十三石 三年二百八十一萬一千七百八十六石至者二百七十九萬八千六百一十三石 泰定元年二百八萬七千二百三十一石至者二百七萬七千二百七十八石 二年二百六十七萬一千一百八十四石至者二百六十三萬七千五十一石 三年三百三十七萬五千七

百八十四石至者三百三十五萬一千三百六十二石 四年三百一十五萬二千八百二十石至者三百一十三萬七千五百三十二石 天曆元年三百二十五萬五千二百二十石至者三百二十一萬五千四百二十四石 二年三百五十二萬二千一百六十三石至者三百三十四萬三百六石

鈔法

鈔始於唐之飛錢宋之交會金之交鈔其法以物為母

鈔為子子母相權而行即周官質劑之意也元初倣唐
宋金之法有行用鈔其制無文籍可考世祖中統元年
始造交鈔以絲為本每銀五十兩易絲鈔一千兩諸物
之直並從絲例是年十月又造中統元寶鈔其文以十
計者四曰一十文二十文三十文五十文以百計者三
曰一百文二百文五百文以貫計者二曰一貫文二貫
文每一貫同交鈔一兩兩貫同白銀一兩又以文綾織
為中統銀貨其等有五曰一兩二兩三兩五兩十兩每

一兩同白銀一兩而銀貨蓋未及行云五年設各路平準庫主平物價使相依準不至低昂仍給鈔一萬二千錠以為鈔本至元十二年添造釐鈔其例有三曰二文三文五文初鈔印用木為板十三年鑄銅易之十五年以釐鈔不便於民復命罷印然元寶交鈔行之既久物重鈔輕二十四年遂改造至元鈔自二貫至五文凡十有一等與中統鈔通行每一貫文當中統鈔五貫文依中統之初隨路設立官庫貿易金銀平準鈔法每花銀

一兩入庫其價至元鈔二貫出庫二貫五文赤金一兩入庫二十貫出庫二十貫五百文偽造鈔者處死首告者賞鈔五錠仍以犯人家產給之其法為最善至大二年武宗復以物重鈔輕改造至大銀鈔自二兩至二釐定為一十三等每一兩準至元鈔五貫白銀一兩赤金一錢元之鈔法至是益三變矣大抵至元鈔五倍於中統至大鈔又五倍於至元然未及期年仁宗即位以倍數太多輕重失宜遂有罷銀鈔之詔而中統至元二鈔

終元之世蓋常行焉凡鈔之昏爛者至元二年委官就
交鈔庫以新鈔倒換除工墨三十文三年減為二十文
二十二年復增如故其貫伯分明微有破損者並令行
用違者罪之所倒之鈔每季各路就令納課正官解赴
省部焚毀隸行省者就焚之大德二年戶部定昏鈔為
二十五樣泰定四年又定焚毀之所皆以廉訪司官監
臨隸行省者行省官同監其制之大畧如此若錢自九
府圖法行於成周歷代未嘗或廢元之交鈔寶鈔雖皆

以錢為文而錢則弗之鑄也武宗至大三年初行錢法立資國院泉貨監以領之其錢曰至大通寶者一文準至大銀鈔一釐曰大元通寶者一文準至大通寶錢一十文歷代銅錢悉依古例與至大錢通用其當五當三折二並以舊數用之明年仁宗復下詔以鼓鑄弗給新舊資用其弊滋甚與銀鈔皆廢不行所立院監亦皆罷革而專用至元中統鈔云

歲印鈔數

中統元年中統鈔七萬三千三百五十二錠 二年
中統鈔三萬九千一百三十九錠 三年中統鈔八
萬錠 四年中統鈔七萬四千錠 至元元年中統
鈔八萬九千二百八錠 二年中統鈔一十一萬六
千二百八錠 三年中統鈔七萬七千二百五十二
錠 四年中統鈔一十萬九千四百八十八錠 五
年中統鈔二萬九千八百八十錠 六年中統鈔二
萬二千八百九十六錠 七年中統鈔九萬六千七

百六十八錠 八年中統鈔四萬七千錠 九年中

統鈔八萬六千二百五十六錠 十年中統鈔一十

一萬一百九十二錠 十一年中統鈔二十四萬七

千四百四十錠 十二年中統鈔三十九萬八千一

百九十四錠 十三年中統鈔一百四十一萬九千

六百六十五錠 十四年中統鈔一百二萬一千六

百四十五錠 十五年中統鈔一百二萬三千四百

錠 十六年中統鈔七十八萬八千三百二十錠

十七年中統鈔一百一十三萬五千八百錠 十八
年中統鈔一百九萬四千八百錠 十九年中統鈔
九十六萬九千四百四十四錠 二十年中統鈔六
十一萬六百二十錠 二十一年中統鈔六十二萬
九千九百四錠 二十二年中統鈔二百四萬三千
八十錠 二十三年中統鈔二百一十八萬一千六
百錠 二十四年中統鈔八萬三千二百錠至元鈔
一百萬一千一十七錠 二十五年至元鈔九十二

萬一千六百一十二錠 二十六年至元鈔一百七十八萬九十三錠 二十七年至元鈔五十萬二百五十錠 二十八年至元鈔五十萬錠 二十九年
至元鈔五十萬錠 三十年至元鈔二十六萬錠

三十一年至元鈔一十九萬三千七百六錠 元貞
元年至元鈔二十一萬錠 二年至元鈔四十萬錠

大德元年至元鈔四十萬錠 二年至元鈔二十
九萬九千九百一十錠 三年至元鈔九十萬七十

五錠 四年至元鈔六十萬錠 五年至元鈔五十萬錠 六年至元鈔二百萬錠 七年至元鈔一百五十萬錠 八年至元鈔五十萬錠 九年至元鈔五十萬錠 十年至元鈔一百萬錠 十一年至元鈔一百萬錠 至大元年至元鈔一百萬錠 二年至元鈔一百萬錠 三年至大銀鈔一百四十五萬三百六十八錠 四年至元鈔二百一十五萬錠中統鈔一十五萬錠 皇慶元年至元鈔二百二十二

萬二千三百三十六錠中統鈔一十萬錠 二年至
元鈔二百萬錠中統鈔二十萬錠 延祐元年至元
鈔二百萬錠中統鈔一十萬錠 二年至元鈔一百
萬錠中統鈔一十萬錠 三年至元鈔四十萬錠中
統鈔一十萬錠 四年至元鈔四十八萬錠中統鈔
一十萬錠 五年至元鈔四十萬錠中統鈔一十萬
錠 六年至元鈔一百四十八萬錠中統鈔一十萬
錠 七年至元鈔一百四十八萬錠中統鈔一十萬

錠 至治元年至元鈔一百萬錠中統鈔五萬錠

二年至元鈔八十萬錠中統鈔五萬錠 三年至元

鈔七十萬錠中統鈔五萬錠 泰定元年至元鈔六

十萬錠中統鈔一十五萬錠 二年至元鈔四十萬

錠中統鈔一十萬錠 三年至元鈔四十萬錠中統

鈔一十萬錠 四年至元鈔四十萬錠中統鈔一十

萬錠 天歷元年至元鈔三十一萬九百二十錠中

統鈔三萬五百錠 二年至元鈔一百一十九萬二

千錠中統鈔四萬錠



元史卷九十三

元史卷九十三考證

至元七年頒農桑之制一十四條 按元典章載是時

頒農桑制凡十五條俱詳著其目志云十四條誤

新收交參戶第一年五斗第二年七斗五升 原本脫

第二年一句據續通考改增

